

摘藻堂四庫全書薈要

史部

欽定四庫全書薈要卷六千二百十

遼史卷八十五

元中書右丞相總裁托克托等修

列傳第十五

蕭達林

蕭觀音努

耶律托色

耶律轄哩

耶律諾觀

蕭柳

高勲

奚和碩烏

蕭持爾格

耶律薩哈

蕭達林字馳寧思溫之再從姪父珠埒哩善相馬應歷
間為馬羣侍中達林幼敦厚有才畧通天文保寧初為
宿直官累任薊劇統和四年宋楊繼業率兵由代州來
侵攻陷城邑達林以諸軍副部署從樞密使耶律色珍
敗之擒繼業于朔州六年秋改南院都監從駕南征攻
沙堆力戰被創太后嘗親臨視明年加右監門衛上將
軍檢校太師遙授彰德軍節度使十一年與東京留守

蕭恒德伐高麗破之高麗稱臣奉貢十二年夏人梗邊
皇太妃受命總烏爾古永興宮分軍討之達林為準布
都詳袞凡軍中號令太妃並委達林師還以功加兼侍
中封蘭陵郡王十五年德呼勒部人殺詳袞而叛遁西
北荒達林將輕騎逐之因討準布之未服者諸蕃歲貢
方物充于國自後往來若一家焉上賜詩嘉獎仍命林
牙耶律昭作賦以述其功達林以諸部叛服不常上表
乞建三城以絕邊患從之俄召為南京統軍使二十年

復伐宋擒其將王先知破其軍于遂城下祁州上手詔
獎諭進至澶淵宋主軍于城隍間未接戰達林按視地
形取宋之羊觀鹽堆鳬鴈中伏弩卒明日轡車至太后
哭之慟輟朝五日子縲古南京統軍使

蕭觀音努字伊聶奚王達哈之孫統和十二年為右祇
候郎君班詳袞遷奚六部大王先是俸秩外給獐鹿百
數皆取于民觀音努奏罷之及伐宋與蕭達林為先鋒
降祁州下德清軍上加優賞同知南院事卒

耶律托色字勝隱北府宰相烏里之孫善射工畫保寧
間為御蓋郎君九年奉使于漢具言兩國通好長久之
計其主繼元深加禮重統和二年將兵與西邊詳袞耶
律蘇色討圖勒錦大破之四年宋將楊繼業陷山西城
邑托色從北院樞密使耶律色珍擊之敗賀令圖于定
安授西南面招討都監宋兵守蔚州急召外援托色聞
之夜伏兵道傍黎明宋兵果來過未半而擊之城巾軍
出色珍復邀之兩軍俱潰奔飛狐地隘不得進殺傷甚

衆賀令圖復集敗卒來襲蔚州托色逆戰破之應州守將自遁進圍寰州冒矢石登城宋軍大潰當色珍擒繼業于朔州托色功居多是年冬復與蕭達林由東路擊宋俘存獲甚衆後聞宋兵屯易州率兵逆之至易境而卒初托色破令圖宋將有因傷而仆托色繪其狀以示宋人咸嗟神妙

耶律轄哩字烏庫哩圖吉部人統和五年宋將楊繼業來攻山西轄哩從耶律色珍擊之常居先鋒偵候有功

是歲伐宋宋人拒於濬沱河轄哩率精騎便道先濟獲
其將康保威以功詔世預節度使選太平元年稍遷本
部節度使六年從蕭惠攻甘州不克會準布攻圍三尅
軍轄哩與部監耶律尼嚕古住救至可敦城西南遇敵
不能陣中流矢卒

耶律諾觀字延寧太祖異母弟南府宰相蘇之孫有膂
力善調鷹隼統和四年宋楊繼業來侵奴爪為黃皮室
紇都監擊敗之盡復所陷城邑軍還加諸衛小將軍及

伐宋有功黃皮室遷詳穩六年再舉將先鋒軍敗宋游
兵于定州為東京通軍使加金紫崇祿階十九年拜南
碩鴈伐烏舍以戰失利削金紫崇祿階十九年拜南府
宰相二十一年復伐宋擒其將王繼忠于黃都俘殺甚
衆以功加同政事門下平章事二十六年為遼興軍節
度使尋復為南府宰相開泰初加尚父卒

蕭柳字圖們淳欽皇后弟阿古齊五世孫幼養于伯父
已雅爾家多知能文膂力絕人統和中叔父恒德臨終

薦其才詔入侍衛十七年南伐宋將范庭召列方陣而待時皇弟隆慶為先鋒問諸將佐誰敢當者柳曰若得駿馬則願為之先隆慶授以甲騎柳攬轡謂諸將曰陣若動諸君急攻遂馳而前敵少却隆慶席勢攻之南軍遂亂中流矢裹創而戰衆皆披靡已雅爾留守東京奏柳為四軍兵馬都指揮使明年為北女直詳袞政濟寬猛部民畏愛遷東路統軍使秩滿百姓願留復任許之從伐高麗遇大蛇當路前驅者請避柳曰壯士安懼此

拔劍斷蛇師還致仕柳好滑稽雖君臣燕飲詼諧無所
忌時人比之俳優臨終謂人曰吾少有致君志不能直
遂故以諧進冀萬有一補俳優名何避頃之被寢衣而
坐呼曰吾去矣言訖而逝耶律觀音努集柳所著詩千
篇目曰歲寒集

高勲字鼎臣晉北平王信輅之子性通敏仕晉為閤門
使會同九年與杜重威來降太宗入汴授四方館使好
結權貴能服勤大臣多推譽之天祿間為樞密使總漢

軍事五年劉崇遣使來求封冊詔勲冊崇為大漢神武
皇帝應歷初封趙王出為上京留守尋移南京會宋又
城益津勲上書請假巡徼以優之帝然其奏宋遂不果
城十七年宋略地益津關勲擊敗之知南院樞密事景
宗即位以定策功進王秦保寧中以南京郊內多隙地
請䟽畦種稻帝欲從之林牙耶律昆宣言於朝曰高勲
此奏必有異志果令種稻以水為畦設以京叛官軍何
自而入帝疑之不納尋遷南樞密使以毒藥餽駙馬都

尉蕭卓琳事覺流銅州尋又謀害尚書令蕭思溫詔族誅之沒其產皆賜思溫家

奚和碩鶻字壽寧本奚汗之裔保寧中為奚六部長統和初皇太后稱制以耶律休格領南邊事和碩鶻為南面行軍副部署四年宋曹彬米信等來侵和碩鶻與休格破宋兵于燕南手詔褒美軍還怙權撾無罪人李浩至死上以其功釋之冬南征將本部軍由別道進擊敵軍於狼山俘獲甚衆八年上表曰臣竊見太宗之時奚

六部二宰相二詳袞誥命大詳袞班在酋長左右副詳袞總知酋長五房族屬二宰相匡輔酋長建明善事今宰相職如故二常袞別無所掌乞依舊制從之十三年秋遷都部署伐烏舍駐于鐵驪林馬數月進至烏舍城利其俘掠請降不許令急攻之城中大恐皆殊死戰和魯碩知不能克從副部署蕭恒德議掠地東南循高麗北界而還以地遠糧絕士馬死傷詔降封爵卒于烏頁郎君班詳袞

蕭特爾格字雄隱五院部人八世祖珠嚕約尼氏時嘗
為虞人唐安祿山來攻珠嚕戰于黑山之陽敗之以功
為北府宰相世預其選特爾格仕開泰間累遷西南面
招討使重熙十一年使西夏諭伐宋事約元昊出別道
以會十二年改右伊勒希巴同知南京留守轉左伊勒
希巴俄授東京留守以世選為北府宰相卒

耶律薩哈字薩蘭伊實部人南府宰相烏魯斯子天祿
間始仕應歷中拜伊實大夫兼知兵馬事乾亨初宋來

侵詔以本部兵守南京與北院大王希達統軍蕭托果等逆戰希達等敗走獨薩哈全軍還上諭之曰拒敵當如此卿勉之無憂不富貴加守太保統和間卒

論曰遼在統和間數舉兵伐宋諸將如耶律轄哩諾觀蕭柳等俱有降城擒將之功最後以蕭達林為統軍直抵澶淵將與宋戰達林中弩我兵失倚和議始定或者天厭其亂使南北之民休息者耶

遼史卷八十五

欽定四庫全書薈要卷六千二百十一

遼史卷八十六

元中書右丞相總裁托克托等修

列傳第十六

耶律和卓

劉景

劉六符

耶律紐幹哩

牛溫舒

杜防

蕭和尚

特默

耶律哈爾吉

耶律佛德

耶律和卓字諾木袞太祖弟迪喇子孫幼不好弄臨事
明敏善談論以近族入侍每從征伐有功保寧初加右
龍虎衛上將軍以宋師屢梗南邊拜涿州刺史西南兵
馬都監招安巡檢等使差推忠奉國功臣和卓久任邊
防雖有克復功然務鎮靜不妄生事以邀近功鄰壤敬
畏屬部又安宋數遣人結歡冀達和意和卓表聞其事
帝許議和安邊懷敵多有力焉拜左金吾衛上將軍秩

滿遙攝鎮國軍節度使卒和卓智而有文曉暢戎政鎮
范陽時嘗領數騎徑詣雄州北門與郡將立馬陳兩國
利害及周師侵邊本末辭氣慷慨左右壯之自是邊境
數年無事識者以謂和卓一言賢於數十萬兵

劉景字可大河間人四世祖怱即朱滔之甥唐右僕射
盧龍軍節度使父守敬南京副留守景資端厚好學能
文燕王趙延壽辟為幽都府文學應歷初遷右拾遺知
制誥為翰林學士九年周人侵燕留守蕭思溫上急變

帝欲俟秋出師景諫曰河北三關已陷于敵今復侵燕

安可坐視上不聽會父憂去未幾起復舊職一日召草

赦既成留數月不出景奏曰唐制赦書日行五百里今

稽期弗發非也上亦不報景宗即位以景忠實擢禮部

侍郎遷尚書宣政殿學士上方欲倚用乃書其笏曰劉

景可為宰相頃之為南京副留守時留守韓匡嗣因扈

從北上景與其子德讓共理京事俄召為戶部使歷武

定開遠二軍節度使統和六年致仕加兼侍中卒年六

十七贈太子太師子慎行孫一德二玄三嘏四端五常
六符皆具六符傳

劉六符父慎行由膳部員外郎累遷至北府宰相監修
國史時上多即宴飲行誅賞慎行諫曰以喜怒加威福
恐未當帝悟諭政府自今宴飲有刑賞事翌日稟行為
都統伐高麗以失軍期下吏議貴乃免出為彰武軍節
度使賜保節功臣子六人一德二玄三嘏四端五常六
符德早世玄終上京留守常歷三司使武定軍節度使

恣其俘獲以飽所欲與進貢字孰多況大兵駐燕萬一
南進何以禦之顧小節忘大患悔將何及宋乃從之歲
幣稱貢六符還加同中書門下平章事及宋幣至命六
符為三司使以受之六符與參知政事杜防有隙防以
六符嘗受宋賂白其事出為長寧軍節度使俄召為三
司使道宗即位將行大冊禮北院樞密使蕭格曰行大
禮備儀物必擇廣地莫若黃川六符曰不然禮儀國之
大體帝王之樂不奏于野今中京四方之極朝覲各得

其所宜中京行之上從其議尋以疾卒

耶律紐幹哩字海蘭六院額爾奇木博果濟後風神爽秀工畫重熙間累遷同知點檢司事駙馬都尉蕭呼都克為夏人所執奉詔索之三返以歸轉永興宮使右祇候郎君班詳袞紐幹哩將娶秦晉長公主孫母與公主婢有隙謂紐幹哩曰能去婢乃許婚紐幹哩計殺之婚成事覺有司以大辟論紐幹哩善畫寫聖宗真以獻得減坐長流邊戍復以寫真拜同知南院宣徽事使宋賀

正寫宋主容以歸清寧間復使宋宋主賜宴瓶花隔面
未得其真陞辭僅一視及境以像示餞者駭其神妙聞
重元亂不即勤王賊平入賀帝責之宴酣顧紐幹哩曰
重元事成卿必為上客紐幹哩大慙咸雍中加太子太
師卒

牛溫舒范陽人剛正尚節義有遠器咸雍中擢進士第
滯小官大安初累遷戶部使轉給事中知三司使事國
民兼足上以為能加戶部侍郎改三司使壽隆中拜參

知政事兼同知樞密院事攝中京留守部民詣闕請真
拜從之召為三司使乾統初復參知政事知南院樞密
使事五年夏為宋所攻來請和解溫舒與蕭塔喇台使
宋方大燕優人為道士裝索土泥藥爐優曰土少不能
和溫舒遽起以手籍土懷之宋主問其故溫舒對曰臣
奉天子威命來和若不從則當卷土收去宋人大驚遂
許夏和還加中書令卒

杜防涿州歸義縣人開泰五年擢進士甲科累遷起居

郎知制誥人以為有宰相器太平中遷政事舍人拜樞密副使重熙九年夏人侵宋宋遣郭禎來告請與夏和上命防使夏解之如約罷兵各歸侵地拜參知政事韓紹芳劉六符忌之防待以誠十二年紹芳等罷愈見信任十三年拜南府宰相生子帝幸其第賜名王門努以進奏有誤出為武定軍節度使十四年復召為南府宰相二十一年秋祭仁德皇后詔儒臣賦詩防為冠賜金帶道宗諒陰為大行皇帝山陵使清寧二年上諭防

曰朕以卿年老嗜酒不欲煩以劇務朝廷之事總綱而已頃之拜右丞相加尚父卒上歎悼不已賙贈加等官給葬具贈中書令謚曰元肅子公謂終南府宰相

蕭和尚字洪寧國舅大父房之後忠直多志畧開泰初補御蓋郎君尋為內史太醫等局都林牙使宋賀正將宴典儀者告班節度使下和尚曰班次如此是不以大國之使相禮且以錦服為貺如待蕃部若果如是吾不預宴宋臣不能對易以紫服位視執政使禮始定八年

秋為唐古特部節度使卒弟特默

特默字和寧為人機辨任氣太平中累遷安東軍節度使有能稱十一年召為左祇候郎君班詳袞遷左伊勒希巴重熙十年累遷北院宣徽使與劉六符使宋索十縣故地宋請增銀絹十萬兩足以易之歸稱旨加同政事門下平章事詔城西南渾底甸還復為北院宣徽使卒

耶律哈爾吉字特們六院額爾奇木博果濟後重熙中

累遷西南面招討都監充宋國生辰使館于白溝驛宋宴勞優者嘲蕭惠河西之敗哈爾吉曰勝負兵家常事我嗣聖皇帝俘石重貴至今興中有石家寨惠之一敗何足較哉宋人慚服帝聞之曰優伶失辭何可傷兩國交好鞭二百免官清寧初起為懷化軍節度使七年入為北院大王封幽國公歷遼興軍節度使東北路詳衮加兼侍中致仕卒哈爾吉明達勤恪懷柔有道置諸賓館及西邊營田皆自哈爾吉發之

耶律博迪字薩巴季父房諾袞之孫孤介寡合重熙初
補牌印郎君清寧初稍遷知易州去官部民請留許之
咸雍八年改彰國軍節度使上獵達里庫山博迪謁于
行宮帝問邊事對曰自應州南境至天池皆我耕牧之
地清寧間邊將不謹為宋所侵烽堠內移似非所宜道
宗然之拜北面林牙後遣人使宋得其侵地命博迪往
定疆界還拜南院宣徽使太康四年遷忠順軍節度使
尋為南院大王改同知南京留守事召拜南府宰相賜

貞良功臣封吳國公為北院樞密使廉謹奉公知無不為大安中致仕卒子錫默北院樞密副使

論曰耶律和卓安邊講好養兵息民其慮深遠矣六符啓釁邀功豈國家之利哉牛杜佛德哈爾吉輩銜命出使幸不辱命紐幹哩殺婢以求婚身負罪釁畫其主容以冀免死亦可醜也

遼史卷八十六

欽定四庫全書薈要卷六千二百十二

遼史卷八十七

元中書右丞相總裁托克托等修

列傳第十七

蕭孝穆

薩巴
孝友

孝先

蕭博諾

耶律布庫

夏行美

蕭孝穆小字和多沁淳欽皇后弟阿古齊五世孫父托
輝為國舅詳袞孝穆庶謹有禮法統和二十八年累遷

西北路招討都監開泰元年遙授建雄軍節度使加檢校太保是年珠拉等變孝穆擊走之冬進軍哈屯城準布部結五羣牧長扎拉圖等謀中外相應孝穆悉誅之廼嚴備禦以待餘黨遂潰以功遷九水諸部安撫使尋拜北府宰相賜忠穆熙霸功臣檢校太師同政事門下平章事八年還京師太平二年知樞密院事充漢人行宮都部署三年封燕王南京留守兵馬都總管九年大延琳以東京叛孝穆為都統討之戰于蒲水中軍稍却

副部署蕭必塔都監蕭博諾以兩翼夾擊賊潰追敗之
于手山北延琳走入城深溝自衛孝穆圍之築重城起
樓櫓使內外不相通城中撤屋以覆其將楊詳世等擒
延琳以降遼東悉平改東京留守賜佐國功臣為政務
寬簡撫納流徙其民安之興宗即位徙王秦尋復為南
京留守重熙六年進封吳國王拜北院樞密使八年表
請籍天下戶口以均徭役又陳諸部及錫里軍利害從
之由是政賦稍平衆悅九年徙王楚時天下無事戶口

蕃息上富于春秋每言及周取十縣慨然有南伐之志
羣臣多順旨孝穆諫曰昔太祖南伐終以無功嗣聖皇
帝仆唐立晉後以重貴叛長驅入汴鑾馭始旋反來侵
軼自後連兵二十餘年僅得和好蒸民樂業南北相通
今國家比之曩曰雖曰富彊然勲臣宿將往往物故且
宋人無罪陛下不宜棄先帝盟約時上意已決書奏不
報以年老乞骸骨不許十一年復為北院樞密使更王
齊薨追贈大丞相晉國王謚曰貞孝穆雖椒房親位高

益畏太后有賜輒辭不受妻子無驕色與人交始終如
一所薦拔皆忠直士嘗語人曰樞密選賢而用何事不
濟若自親煩碎則大事凝滯矣自蕭和卓以吏才進其
後轉効不知大體歎曰不能移風易俗偷安爵位臣子
之道若是乎時稱為國寶臣目所著文曰寶老集二子
阿拉薩巴弟孝先孝忠孝友各有傳

薩巴字周隱七歲以戚屬加左右千牛衛大將軍重熙
初補祗候郎君性廉介風姿爽朗善球馬馳射帝每燕

飲喜諧謔薩巴雖承寵顧常以禮自持時人稱之以柴
冊禮恩加檢校太傅永興宮使總領左右護衛同知點
檢司事尚魏國公主拜駙馬都尉為北院宣徽使仍總
知朝廷禮儀重熙末出為西北路招討使武寧郡王居
官以治稱清寧初薨年三十九追封齊王

孝先字延寧小字哈里統和十八年補祗候郎君尚南
陽公主拜駙馬都尉開泰五年為國舅詳袞將兵城東
鄙還為南京統軍使太平三年為漢人行宮都部署尋

加太子太傅五年遷上京留守以母老求侍復為國舅
詳袞改東京留守會大延琳反被圍數月穴地而出延
琳平留守上京十一年帝不豫欽哀召孝先總禁衛事
興宗諒陰欽哀弒仁德皇后孝先與蕭楚布蕭必塔等
謀居多及欽哀攝政還授天平軍節度使加守司徒兼
政事令重熙初封楚王為北院樞密使孝先以椒房親
為太后所重在樞府好惡自恣權傾人主朝多側目二
年太后與孝先謀廢立事帝知之勒衛兵出宮召孝先

至諭以廢太后意孝先震懾不能對遷太后于慶州孝
先恒鬱鬱不樂四年徙王晉後為南京留守卒謚忠肅
孝友字塔布布延小字辰瑠開泰初以戚屬為小將軍
太平初以大冊加左武衛大將軍檢校太保賜名孝友
重熙元年累遷西北路招討使封蘭陵郡王八年進王
陳先是蕭惠為招討使專以威制西羗諸夷多叛孝友
下車厚加綏撫每入貢輒增其賜物羗人以安久之寢
成姑息諸夷桀驁之風遂熾議者譏其過中十年加政

事令賜劾節宣庸定遠功臣更王吳後以葬兄孝穆孝
忠還京師拜南院樞密使加賜翊聖協穆保義功臣進
王趙拜中書令丁母憂起復北府宰相出知東京留守
會伐夏孝友與樞密使蕭惠失利河南帝欲誅之太后
赦免復為東京留守徙王燕改上京留守更王秦清寧
初加尚父頃之復留守東京明年復為北府宰相帝親
製誥詞以褒寵之以柴冊恩遙授洛京留守益賜純德
功臣致仕進封豐國王生子呼都克首與重元亂伏誅

年七十三呼都克在逆臣傳

蕭博諾字留隱奚王楚布寧之後幼孤貧傭于醫家牧牛傷人稼數遭笞辱醫者嘗見博諾熟寐有蛇遶身異之教以讀書聰敏嗜學不數年涉獵經史習騎射既冠意氣豪邁開泰間選充護衛稍進用俄坐罪黥流烏爾古久之召還累任劇遷奚六部大王治有聲太平九年大延琳據東京叛博諾為都監將右翼軍遇賊戰蒲水中軍少却博諾與左翼軍夾攻之先據高麗女直要衝

使不得求援又敗賊于手山延琳走入城博諾不介馬而馳追殺餘賊已而大軍圍東京博諾討諸叛邑平吼山賊延琳堅守不敢出既被擒博諾以功加兼侍中重熙六年改北準布副部署再授奚六部大王十八年為西南面招討使西征夏國博諾以兵二千據河橋聚巨艦數十艘仍作大鉤人莫測戰之日布舟于河綿亘三十餘里遣人伺上流有浮物輒取之大軍既失利博諾未知適有大木順流而下勢將壞浮梁斷歸路操舟者

爭鉤致之橋得不壞明年復西征懸兵深入大掠而還
復爲奚六部大王致仕卒

耶律布庫字提隱太祖弟蘇之四世孫以武勇稱統和
初爲涿州刺史從伐高麗有功開泰末爲上京內客省
副使太平二年城鴨綠江布庫守之在鎮有治績五年
改廣德軍節度使尋遷東京統軍使莅政嚴肅諸部懾
服九年大延琳叛以書結保州夏行美執其人送布庫
蒲古人據保州延琳氣沮以功拜特哩袞十一年爲子

鐵驪所弑

夏行美渤海人太平九年大延琳叛時行美總渤海軍
于保州延琳使人說欲與俱叛行美執送統軍耶律布
庫又誘賊黨百人殺之延琳謀沮廼嬰城自守數月而
破以功加同政事門下平章事錫賚甚厚明年擢忠順
軍節度使重熙十七年遷副部署從點檢耶律義先計
富珠哩獲其首托多羅以歸致仕卒上思其功遣使祭
于家

論曰不有君子其能國乎方其擒延珠定遼東一時諸將之功偉矣宜其撫劔抵掌賈餘勇以威天下也蕭孝穆之諫南侵其意防微何其弘遠歟是豈瞋句語難者所能知哉至論移風俗為治之本親煩碎為失大臣體又何其深切著明也為國寶臣宜矣孝先預弒仁德之謀猶依城社以逃熏灌為國巨蠹雖功何議焉

遼史卷八十七

遼史卷八十七考證

蕭孝穆傳孝穆二子阿拉薩巴 按聖宗本紀太平四年以孝穆子蕭順為千牛衛將軍百官志同考孝穆子無有名順者此處薩巴傳有加千牛衛大將軍正與紀合疑蕭順即薩巴之賜名紀載互異也

蕭博諾傳十八年為西南招討使西征夏國 按興宗本紀及西夏外紀俱係重熙十八年伐夏刻本舊作十五年係誤謹據改



遼史卷八十七考證

欽定四庫全書

總校官原候補知府臣葉佩蓀

校對官編修臣吳錫麒

謄錄監生臣孫樹新

欽定四庫全書薈要

史部

遼史卷

八十八至
九十八

詳校官祭酒臣章謙恒



欽定四庫全書薈要卷六千二百十三

遼史卷八十八

元中書右丞相總裁托克托等修

傳第十八

蕭迪里

耶律博諾

蕭巴雅爾

恒德
必塔

耶律揚珠

高正

大康又

蕭迪里字尼增古宰相塔喇四世孫識度弘遠為鄉里
推重始為牛群敞史帝聞其賢召入侍遷國舅詳袞統
和二十八年帝謂群臣曰高麗康肇殺其君誦立誦族
兄詢而相之大逆也宜發兵問其罪郡臣皆曰可迪里
諫曰國家連年征討士卒抗敝况陛下諒陰又年穀不
登創痍未復島夷小國城壘完固勝不為武萬一失利
恐貽後悔不如遣一介之使往問其故彼若伏罪則已

不然俟服除歲豐舉兵未晚時令已下言雖不行識者
韙之明年同知左伊勒希巴事尋改右開泰初率兵巡
西邊額爾奇木部下扎薩克轄布喇奇實卜克率部民
遁迪里追擒之令復業遷國舅詳袞從樞密使耶律世
良伐高麗還加同政事門下平章事拜上京留守迪里
為人寬厚達政體廷臣皆謂有王佐才漢人行宮都部
署王繼忠薦其材可謂樞密使帝疑其黨而止為中京
留守卒族子和克有傳弟巴拉

把拉字布哩音多智善騎射開泰間以兄為右伊勒希
巴補郎君累遷奚六部圖哩太尉太平末大延琳叛巴
拉將北南院兵往討遇于蒲水南院兵少却至手三復
與賊遇把拉乃易兩院旗幟鼓勇力戰破之上聞以手
詔褒獎賜內廐馬重熙中遷四捷軍詳袞謝事歸鄉里
數歲起為昭德軍節度使尋改國舅詳袞卒

耶律傳諾字和多沁特哩袞尼嚕古之孫景宗時為烏
爾古部詳袞嚴急民苦之有司以聞詔曰博諾任方面

寄以細故究問恐損威望尋遷馬群太保統和十六年
隱實燕軍之不任事者汰之二十八年駕征高麗博諾
為先鋒至銅州高麗將康肇分兵為三以抗我軍一營
于州西據三水之會肇居其中一營近州之山一附城
而營博諾率耶律鴻觀擊破三水營擒肇李玄蘊等軍
望風潰會大軍至斬三萬餘級追至開京破敵於西領
高麗王詢聞邊城不守遁去博諾入開京焚其王宮迺
撫慰其民人上嘉其功遷北院大王薨

蕭巴雅爾字韓隱國舅少文房後多智略能騎射統和奪其裨城陷中流矢太后親臨視賜藥攻長城口復先登太后益多其功時高麗未附恒德受詔率兵拔其邊城王始懼上表請降十二年八月賜啟聖竭力功臣從都部署和碩烏討烏舍未戰烏舍請降恒德利其俘獲不許烏舍死戰城不能援和碩烏議欲引退恒德曰以彼倔强吾奉詔來討無功而還諸部謂我何若深入多獲猶勝徒返和朔烏不得已進擊東南諸部至高麗北

鄙比還道遠糧絕士馬死傷甚衆坐是削功臣號十四
年為行軍都部署伐博囉滿達部還公主疾太后遣宮
人賢釋侍之恒德私馬公主恚而薨太后怒賜死後追
封蘭陵郡王子必塔

必塔字蘇隱一名昌裔生未月父母俱死育于禁掖既
長尚秦晉王公主拜駙馬都尉為殿前副點檢統和八
年改北面林牙太平四年遷殿前都點檢出為國舅詳
袞九年渤海大延琳叛劫掠隣部與南京留守蕭孝穆

往討孝穆欲全城降乃築重城圍之數月城中人陰來
納款遂擒延琳東京平以功封蘭陵郡王十一年聖宗
不豫先是欽哀與仁德皇后有隙以必塔嘗為后所愛
忌之時護衛馮嘉努上變誣弟楚布與必塔謀逆事皇
后攝政徐議當立者公主竊聞其謀謂必塔曰爾將無
罪被戮與其死何若奔女直國以全其生必塔曰朝廷
詎肯以飛語害忠良寧死弗適他國及欽哀攝政殺之
耶律資忠字烏延小字札拉系出仲父房兄果羅善属

文聖宗重之時妻弟之妻阿古與奴通將奔女直國果
羅追及奴殺之阿古自經阿古母有寵于太后事聞太
后怒將殺之帝度不能救遣人訣別問以後事果羅謝
曰陛下憫臣無辜恩漏九泉死且不朽既死人多冤之
在獄著冤賦寤寐歌為世所稱資忠博學工辭章年四
十未仕聖宗知其賢召補宿衛數問以古今治亂資忠
對無隱開泰中授中丞眷遇日隆初高麗內屬取女直
六部地以賜至是貢獻不時至詔資忠往問故高麗無

歸地意由是權貴數短於上出為上京副留守四年再
使高麗留弗遣資忠每懷君親輒有著述號西亭集帝
與羣臣宴時一記憶曰資忠亦有此樂乎九年高麗上
表謝罪始送資忠還帝郊迎同載以歸命大臣宴勞留
禁數日日謂曰朕將屈卿為樞密何如資忠對曰臣不
才不敢奉詔乃以為林牙知特哩衮事初資忠在高麗
弟昭為著帳郎君坐罪沒家產至是乃復橫帳且還舊
產詔以外戚女妻之是時樞密使蕭和卓少師蕭巴噶

有寵資忠不肯俛附詆之常怒奪官數歲出知來遠城
事歷保定昭德二軍節度使聖宗崩表請會葬既至伏
梓宮大慟曰臣幸遇聖明橫被構讒不獲盡犬馬報氣
絕而蘇興宗命醫治疾久之言國舅侍中無憂國心陛
下不當復用唐景福舊號於是用事者惡之遣歸鎮卒
弟昭有傳

耶律揚珠字布爾錦積慶宮人父海古勒室韋部節度
使揚珠篤學廉介有經世志統和十年累遷積慶宮使

聖宗嘗諭楊珠曰聞卿正直是以進用國有利害爾言
宜無所隱由是所陳多見嘉納上征高麗破康肇軍于
銅州楊珠之力為多王詢乞降羣臣議皆謂宜納楊珠
曰王詢始一戰而敗遽求納款此詐耳納之恐墜其姦
計待其勢窮力屈納之未絕已而詢果遁清野無所獲
其衆阻險而壘攻之不下楊珠以計降之擢拜四蕃部
詳袞時招討使耶律頗的為總管楊珠恥居其下上表
曰臣先朝舊臣今既垂老乞還新命覬得常侍左右帝

曰朕不使汝久處是任且命無隸招討得專奏事到部
戰暴懷善政績顯著卒于官

耶律鴻觀字巴爾諾延約尼森濟汗之後統和初嘗以
軍事任為伊喇詳袞尋徙南京統軍使十三年徇地南
鄙克敵於四岳斬首百餘級攻宋以戰功遷東京留
守封楚國公後伐高麗副先鋒耶律博諾擒康肇于銅
州三十年西北部叛從南府宰相耶律諾袞討之及
典禁軍號令整肅諸部多降尋遷侍中卒

高正不知何郡人統和初舉進士第累遷樞密直學士
上將伐高麗遣正先往諭意及還遷右僕射時高麗王
詢表請入覲上許之遣正率騎兵千人迓之館于路為
高麗將卓思正所圍正以勢不可敵與麾下壯士突圍
出士卒死傷者衆上悔輕發釋其罪明年遷工部侍郎
為北院樞密副使開泰五年卒

耶律達魯字伊聶仲父房之後習兵事為左皮室詳袞
統和二十八年伐高麗達魯率本部軍與博諾等擒康

肇李玄蘊于銅州帝壯之曰以卿英才為國戮力真吾
家千里駒也乃賜御馬及細鎧明年為北院大王出為
烏爾古德呼勒部都詳衮年七十二卒

大康又渤海人開泰間累官南府宰相出知黃龍府善
綏撫東部懷服額爾德尼部長布延與伊勒必來附送
于朝言博囉滿達勒界多渤海人乞取之詔從其請康
又領兵至大石河圖卜準城掠數百戶以歸未幾卒

論曰高句驪弑其君誦而立詢遼興問罪之師宜其簞

食壺漿以迎除舍以待而廼乘險旅拒俾智者竭其謀
勇者窮其力雖得其要領而顓顓獨居一海之中自若也
豈服人者以德而不以力歟况乎殘毀其宮室係累其
民人所謂以燕伐燕也歟嗚呼朱崖之棄捐之之力也
迪里之諫有焉

欽定四庫全書薈要卷六千二百十四

遼史卷八十九

元中書右丞相總裁托克托等修

列傳第十九

耶律庶成

庶箴

富魯

楊哲

耶律哈瑠

楊佖

耶律和尚

耶律庶成字喜隱小字晨類季父房之後父烏津檢校

太師庶成幼好學書過目不忘善遼漢文字於詩尤工
重熙初補牌印郎君累遷樞密直學士與蕭罕嘉努各
進四時逸樂賦帝嗟賞初契丹醫人鮮知切脉審藥上
命庶成譯方脉書行之自是人皆通習雖諸部族亦知
醫事時入禁中叅決疑議偕林牙蕭罕嘉努等撰實錄
及禮書與樞密副使耶律德脩定法令上詔庶成曰方
今法令輕重不倫法令者爲政所先人命所繫不可不
慎卿其審度輕重從宜修定庶成參酌古今刊正訛謬

成書以進帝覽而善之方嚮用時爲妻呼圖克所誣以
罪奪官絀爲庶耶律使吐蕃凡十二年清寧間始歸帝
知其誣詔復本族仍遷所奪官卒庶成嘗謂林牙夢善
卜者呼嚕古卜曰官止林牙因妻得罪及置於理法當
離婚呼圖克適有娠至期不產死剖視之其子以手抱
心識者謂誣夫之報有詩文行於世弟庶箴

庶箴字辰富善屬文重熙中爲本族將軍咸雍元年同
知東京留守事俄徙烏延笑厥部節度使九年知薊州

事明年遷都林牙上表乞廣本國姓氏曰我朝創業以來法制修明惟姓氏止分爲二耶律與蕭而已始太祖制契丹大字取諸部鄉里之名續作一篇著於卷末臣請推廣之使諸部各立姓氏庶男女婚媾有合典禮帝以舊制不可遽釐不聽太康二年出耶律伊遜爲中京留守庶箴與耶律孟簡表賀頃之伊遜復爲樞密使專權恣虐庶箴私見伊遜泣曰前抗表非庶箴之願也伊遜信其言乃得自安聞者鄙之八年致仕卒子富魯

富魯字努展幼聰悟好學甫七歲能誦契丹大字習漢文未十年博通經籍重熙中舉進士第主文以國制無契丹試進士之條聞於上以庶箴擅令子就科目鞭之二百尋命富魯爲牌印郎君應詔賦詩立成以進帝嘉賞顧左右曰文才如此必不能武事富魯奏曰臣自蒙義方兼習騎射在流輩中亦可周旋帝未之信會從獵三矢中三兔帝奇之轉通進是時父庶箴嘗寄誠諭詩富魯荅以賦衆稱其典雅寵遇漸隆清寧初卒

楊哲字昌時安次人幼通五經大義聖宗聞其穎悟詔試詩授秘書省校書郎太平十一年擢進士乙科爲著作佐郎重熙十二年累遷樞密都承旨權度支使登對稱旨進樞密副使歷長寧軍節度使山西路轉運使知興中府清寧初入知南院樞密使與姚景行同總朝政請行柴冊禮封趙國公以足疾復知興中府咸雍初徙封齊召賜同德功臣尚書左僕射兼中書令拜樞密使改封晉給宰相樞密使兩廳僚從封趙王屢請歸政益

賜保節功臣致仕太康五年例改遼西郡王薨

耶律哈瑠字索紐仲父隋國王之後有明識篤行義舉
止嚴重工爲詩統和間召攝御院通進開泰三年稍遷
烏爾古德呼勒部都監知詳袞事德呼勒叛將宮分軍
從樞密使耶律世良平之加千牛衛大將軍重熙元年
累遷至同知上京留守改奚六部圖嚕太尉性不苟合
爲樞密使蕭嘉哩所忌上欲召用哈瑠嘉哩言目疾不
能視議遂寢四年召爲北面林牙帝曰朕早欲用卿聞

有疾故待之至今哈瑠對曰臣昔有目疾才數月耳然亦不至於昏第臣駑拙不能事權貴是以不獲早覩天顏非陛下聖察則愚臣豈有今日耶詔進述懷詩上嘉歎方將大用卒

楊佺字正叔南京人幼穎悟異常讀書自能成句識者奇之弱冠聲名籍甚統和二十四年舉進士第一歷校書郎大理正開泰六年轉儀曹郎典掌書命加諫議大夫出知易州治尚清簡徵發期會必信入爲大理少卿

累遷翰林學士文章號得體八年燕地饑疫民多流殍
以佶同知南京留守事發倉廩振乏絕貧民鬻子者計
傭而出之宋遣梅詢賀千齡節詔佶迎送多唱酬詢每
見稱賞復爲翰林學士重熙元年陞翰林學士承旨丁
母憂起復工部尚書歷忠順軍節度使朔武等州觀察
處置使天德軍節度使加特進檢校太師同中書門下
平章事復拜參知政事兼知南院樞密使十五年出爲
武定軍節度使境內亢旱苗稼將槁視事之夕雨澤霑

足百姓歌曰何以蘇我上天降雨誰其撫我楊公爲主
灤陽水失故道歲爲民害乃以已俸創長橋人不病涉
及被召郡民攀轅泣送上御清涼殿宴勞之即日除吏
部尚書兼門下侍郎同中書門下平章事上曰卿今日
何減呂望之遇文王佶對曰呂望比臣遭際有十年之
晚上悅其居相位以進賢爲已任事總大綱責成百司
人人樂爲之用三請致政許之月給錢粟僚隸四時遣
使存問卒有登瀛集行于世

耶律和尚字特默系出季父房善滑稽重熙初補祗候
郎君時帝篤於親親凡三父之後皆序父兄行第於和
尚尤狎愛然每侍宴飲雖詼諧未嘗有一言之過由是
上益重之歷積慶永興宮使累遷至同知南院宣徽使
事南面林牙十六年出爲懷化軍節度使俄召爲御史
大夫二十三年因大冊加天平軍節度使檢校太師徙
中京路案問使卒和尚雅有美行數以財恤親友人皆
愛重然嗜酒不事事以故不獲柄用或以爲言答曰吾

非不知顧人生如風燈石火不飲將何爲晚年沈湎尤甚人稱爲酒仙云

論曰庶成定法令治民者不容高下其手庶箴雖嘗表請廣姓氏以秩典禮其隨勢俯仰則有愧於其子富魯矣楊哲爲上寵遇迭封王爵而功業不少槩見然得愛民治國之要其楊佶哉

遼史卷八十九

遼史卷八十九考證

耶律庶成傳補牌印郎君 按百官志耶律庶成嘗爲翰林都林牙在重熙十三年與興宗本紀合傳未載

遼史卷八十九考證

欽定四庫全書

遼史卷九十

元中書右丞相總裁托克托等修

列傳第二十

義先

弟信先

蕭托輝

蕭塔喇
唱附

耶律達魯

義先性剛直嘗因侍讌言于帝曰格校佞喜亂一朝大用必誤國家言甚激切不納它日侍宴上命羣臣博負者罰一巨觥義先當與格對憮然曰臣縱不能進賢退

不肖安能與國賊博哉帝止之曰卿醉矣義先厲聲詬
不已上大怒賴皇后救得解翌日上謂格曰義先無禮
當黜之格對曰義先天性忠直今以酒失而黜誰敢言
人之過上謂格忠直益加信任義先鬱鬱不自得然議
事未嘗少沮又於上前博義先祝曰向言人過冒犯天
威今日一擲可表愚款俄得堂印上愕然十六年為殿
前都點檢討富珠哩多所招降獲其酋長托多羅以歸
手詔褒獎以功改南京統軍使封武昌郡王奏請統軍

司錢營息以贍貧民未朞軍罷完整民得休息二十一年拜特哩袞進王富春薨年四十二義先常戒族人曰國中三父房皆帝之昆弟不孝不義尤不可為其接下無貴賤賢否皆與均禮其妻晉國長公主之女每遇中表親非禮服不見故內外多化之清寧間追贈許王弟信先

信先興宗以其父貴音為刺血友幼養于宮善騎射重熙十四年為左護衛太保同知殿前點檢司事十八年

兼右祇候郎君班詳袞上問所欲信先曰先臣貴音與
陛下分如同氣然不及王封儻使蒙恩地下臣願畢矣
上曰此朕遺忘之過追封燕王是年從蕭惠伐夏敗於
河南例被責清寧初為南面林牙卒

蕭托輝字烏庫哩宰相轄達六世孫剛直有威重咸雍
初任馬羣太保素知羣牧名存實亡悉閱舊籍除其羸
病錄其實數牧人畏服托輝上書曰羣牧以少為多以
無為有上下相蒙積弊成風不若括見真數著為定籍

公私兩濟從之畜產歲以蕃息太康中累遷契丹行宮
都部署上嘗謂羣臣曰北樞密院軍國重任久闕其人
耶律阿蘇蕭額特埒二人孰愈羣臣各譽所長托輝獨
默然上問卿何不言托輝曰額特埒懦而敗事阿蘇有
才而貪將為禍基不得已而用敗事猶勝基禍上曰托
輝雖魏徵不能過但恨吾不及太宗爾然竟以阿蘇為
樞密使由是阿蘇銜之九年西園不寧阿蘇奏曰邊隅
事大可擇重臣鎮撫上曰托輝何如阿蘇曰誠如聖旨

遂拜西南面招討使阿蘇陰與蕭阿古岱誣奏賊掠漠
南牧馬及居民畜產托輝不急追捕罪當死詔免官久
之起為塔布城節度使未行疽廢背卒托輝負氣怒則
須髯輒張每有大議必毅然決之雖上有難色未嘗遽
已見權貴無少屈竟為阿蘇所陷時人惜之二子曰圖
木轄式阿蘇死始獲進用

蕭塔喇噶字托實六院部人素剛直太祖時坐叔祖達
實謀殺裕悅實魯沒入弘義宮世宗即位以舅氏故出

其藉補國舅別部敝史或言泰寧王察克有無君心塔喇噶曰彼縱忍行不義人孰肯從他日侍宴酒酣塔喇噶捉察克耳強飲之曰上固知汝傲狠然以國屬曲加矜憫使汝在左右且度汝才何能為若長惡不悛徒自取赤族之禍察克不能答強笑曰何戲之虐也天祿未塔喇噶為北府宰相及察克作亂塔喇噶醉詈曰吾悔不殺此逆賊尋為察克所害

耶律達魯字陽隱孟父楚國王之後性質直多膂力察

克作亂達魯聞之入見壽安王慷慨言曰願得精兵數百破賊黨王嘉其忠穆宗即位為北院宣徽使上以飛狐道狹詔達魯廣之明年將兵援河東至太原與漢王會于高平擊周軍敗之仍降其衆忻代二州叛將兵討之會耶律塔喇至敗周師於忻口師還卒

論曰忠臣惟知有國而不知有身故惡惡不避其患阿拉以諂諛不法折蕭格托輝以用必基禍言阿蘇塔喇噶以忍行不義徒自取赤族之罪責察克其心可謂忠

矣言一出而禍輒隨之吁邪正既不辨國焉得無亂哉

遼史卷九十

欽定四庫全書蒼要卷六千二百十五

遼史卷九十一

元中書右丞相總裁托克托等修

列傳第二十一

耶律罕巴

耶律唐古

蕭珠展

藥師努

耶律玦

耶律布勒圖

耶律罕巴字嘲隱北院詳袞古之五世孫倜儻有大志
太平中游京師寓行宮側惟囊衣匹馬而已帝徵服出

獵見而問之曰汝為何人罕巴初不識漫應曰我北院部人罕巴來覓官耳帝與語知有長才陰識之會北院奏南京疑獄久不決帝召罕巴馳驛審錄舉朝皆驚罕巴量情處理人無冤者上嘉之籍羣牧馬闕其二同事者考尋不已罕巴畧不加詰即先馳奏帝益信任景福元年為左伊勒希巴徙北面林牙眷遇優異重熙中改北院大王政務寬仁復為左伊勒希巴十二年再為北院大王入朝帝從容謂曰卿守邊任重當實府庫振貧乏

以報朕既受詔愈竭忠謹知無不言便益為多卒年五十五上聞悼惜死之日篋無舊蓄梳無新衣遣使弔祭給葬具罕巴平居不屑細務喜愠不形嘗失所乘馬家僮以同色者代之數月不覺

耶律唐古字敵隱裕悅烏哲之庶子廉謹善屬文統和二十四年述烏哲安民治盜之法以進補小將軍遷西南面巡檢歷壕州刺史唐古特部詳衮嚴科條禁姦民鬻馬於宋夏界因陳弭私販安邊境之要太后嘉之詔

邊境遵行著為令朝議欲廣西南封域黑山之西綿亘數千里唐古言戍壘太遠卒有警急赴援不及非良策也從之西蕃來侵詔議守禦計命唐古勸督耕稼以給西軍田于臚朐河側是歲大熟明年移屯鎮州凡十四稔積粟數十萬斛斗米數錢重熙間改烏延党項部節度使先是築哈屯城以鎮西域諸部縱民畜牧反招寇掠重熙四年上疏曰自建哈屯城已來西蕃數為邊患每煩遠戍歲月既久國力耗竭不若復守故疆省罷戍

役不報是年致仕乞勒其父烏哲功于石帝命耶律庶成製文勒石上京崇孝寺卒年七十八

蕭珠展字實倫孝穆弟果濟之子也以戚屬加監門衛上將軍重熙十三年將衛兵討李元昊有功遷興聖宮使富珠哩部長托多羅珠展為統軍都監從都統耶律義先擊之擒托多羅珠展與義先不協誣義先罪免官稍遷西南面招討都監坐事下獄以太后言杖而釋之清寧初為國舅詳袞西北路招討使私取官粟三百

斛及代留畜產令主者鬻以償後族弟呼克圖到部發
其事帝怒決以大杖免官尋起為昭德軍節度使徵為
北院宣徽使九年上以珠展先為招討威行諸部復為
西北路招討使訓士卒增器械省追呼嚴號令人不敢
犯邊境晏然十年入朝封柳城郡王咸雍二年拜北府
宰相為北院樞密使耶律伊遜所忌誣珠展與護衛蕭
和克等謀害伊遜詔獄無狀罷相出鎮順義軍卒追王
晉宋梁三國姪藥師努

藥師努幼穎悟謹禮法補祇候郎君太康中為興聖宮
使遷同知殿前點檢司事上嘉其宿衛嚴肅遷布伊勒
希巴夏王李乾順為宋所攻求解帝命藥師努持節使
宋請罷兵通好宋從之拜南面林牙改漢人行宮副部
署乾統初出為安宋軍節度使卒

耶律玦字烏展約尼森濟汗之後也重熙初召修國史
補符寶郎累遷知北院副部署事入見太后后顧左右
曰先皇謂玦必為偉人果然除樞密副使出為西南面

招討都監歷同簽南京留守事南面林牙皇弟秦國王
為遼興軍節度使以玦同知使事多所匡正十年復為
樞密副使咸雍初兼北院副部署及秦國王為西京留
守請玦為佐從之歲中獄空者三召為孟父房詳袞玦
不喜貨殖帝知其貧賜宮戶十嘗謂宰相曰契丹忠正
無如玦者漢人則劉仲而已然熟察之玦優於仲先是
西北諸部久不能平上遣玦問狀執弛慢者痛繩之以
酒疾卒

耶律布勒圖字燕隱六院林牙圖魯卜四世孫也開泰
間為本班郎君有捕盜功樞密使蕭朴薦之遷率府率
太平中同知南院宣徽事累遷彰聖軍節度使十六年
知興中府以獄空聞十八年伐夏攝西南面招討使十
九年夏人侵金肅軍敗之斬首萬餘級加右武衛上將
軍時近邊羣牧數被寇掠遷倒塌嶺都監以治之桴鼓
不鳴二十年知金肅軍事宰相趙惟節總領邊城橋道
芻粟請貳帝命布勒圖副之以稱職聞清寧初歷長寧

匡義二軍節度使致仕咸雍間卒子阿古齊終倒塌嶺
都監

論曰罕巴因帝微行才始見售及任以事落落知大體
不負上之知矣唐古珠展經畧西北邊勸農積粟訓練
士卒敵人不敢犯玦以忠直見稱於上布勒圖以幹敏
為宰相佐在鎮俱以獄空聞之數人者豈特甲冑之士
亦李牧程不識之亞歟

遼史卷九十一

遼史卷九十一考證

耶律唐古傳歷壕州刺史

按壕州刻本舊作豪州考

地理志壕州在顯州東北二百二十里又營衛志亦有壕州之名謹据改

重熙四年上疏不報是年致仕

按宏簡錄重熙十四

年唐古為右伊勒希巴興宗本紀則係十七年事是唐古致仕當在十七年之後且嘗為伊勒希巴也傳有脫訛

遼史卷九十一考證

欽定四庫全書薈要卷六千二百十六

遼史卷九十二

元中書右丞相總裁托克托等修

列傳第二十二

蕭道拉 蕭布達 耶律浩善 耶律古裕

耶律圖丹 蕭罕扎 蕭烏頁

蕭道拉字綏蘭約尼溫汗宮人祖尼嚕古北院樞密副使父薩滿字和多沁重熙初補授祗候郎君累遷北面

林牙十九年從耶律伊遜蕭博諾伐夏至蕭惠敗績之地獲偵候者知人烟聚落多國人臨沒而不能還者盡俘以歸拜大父詳袞知山北道邊境事清寧初歷西南面西北路招討使加同中書門下平章事卒道拉體貌豐偉善騎射由祇候郎君陞漢人行宮副部署後為烏爾古德呼勒統軍使克敵有功加龍虎衛上將軍授西北路招討使因陳北邊利害請以本路諸部與倒塌嶺統軍司連兵屯戍再表不納改東北路統軍使乾統初

以久練邊事復為西北路招討使北準布尼都格爾率鄰部來侵道拉逆擊追奔數十里乘尼都格爾無備以輕騎襲之獲馬萬五千匹牛羊稱是先是有詔方面無事招討副統軍都監內一員入覲是時同僚皆闕道拉以軍事付幕吏而朝坐是免官改西京留守復為東北路統軍卒于官

蕭布達字彈隱統和初為南院承旨開泰六年為烏爾古節度使七年德呼勒叛平之徙烏爾古德呼勒都監

遣德呼勒騎卒取北準布名馬以獻詔褒獎重熙初改
烏爾古德呼勒都詳袞討諸蕃有功布達深練邊事能
以悅使人有所俘獲悉散麾下由是大得衆心歷西南
面招討使党項叛入西夏布達討之中流矢歿于陣帝
聞惜之賻贈加厚

耶律浩善字托紐北院額爾奇木博果濟之後祖徹珍北
院大王父和克黃皮室詳袞浩善初為西南巡邊官以
廉潔稱累遷南京統軍使尋為北院大王重熙十一年

党項部人多叛入西夏浩善受詔巡西邊沿河要地多
建城堡以鎮之徙東京留守十三年與知府蕭烏魯斯
討博囉滿達部有功加兼侍中致仕卒

耶律古裕字穆爾沁北院林牙圖魯卜之後有膂力工
馳射開泰間為烏爾古德呼勒都監會部人叛從樞密
使耶律世良討平之以功詔鎮撫西北部教以種樹畜
牧不數年民多富實中京盜起命古裕為巡邏使悉擒
之上親征渤海將黃皮室軍有破敵功累遷御史中丞

尋授開遠軍節度使徙鎮歸德二十一年改天成軍節
度使卒于官年七十贈同中書門下平章事二子伊遜
鄂摩伊遜重熙間從蕭惠討西夏惠敗績伊遜一軍獨
全拜北院大王鄂摩太康三年為漢人行宮副部署伊
遜誣害太子詞連鄂摩帝釋之是秋伊遜復奏與蕭楊
結私議宮壺事被害乾統間贈同中書門下平章事

耶律圖丹字和多沁太師古裕之子重熙初為左護衛
將禁兵從伐夏有功授十二行紂司徒再舉伐夏圖丹

括山西諸郡馬還遷伊喇詳袞西南未平命圖丹同知
金肅軍事夏人來侵擊敗之進納喇阿爾威節度使清
寧元年召為皇太后左護衛太保四年改寧遠軍節度
使東路饑奏賑之歷五國烏爾古遼興軍三鎮節度使
四捷軍詳袞太康元年卒追贈同中書門下平章事子
阿蘇有傳

蕭罕扎國舅之族姓端簡謹愿動循禮法清寧中為護
衛太保太康二年遷知北院樞密副使三年經畫西南

邊天池舊塹立堡砦正疆界刻石而還為漢人行宮都
部署是年秋獵墮馬卒

蕭烏頁字草隱其先出興聖宮分觀察使塔哩濟之孫
也性孝悌尚禮法雅為鄉黨所稱重熙中補護衛興宗
見其勤恪遷護衛太保佐耶律仁先平重元亂以功加
團練使時德呼勒數為鄰部侵擾民多困弊命烏頁為
德呼勒節度使恤困窮省徭役不數月部人以安尋以
母老歸養于家母亡尤極哀毀服闋歷官興聖延慶二

宮使卒

論曰烏爾古德呼勒大部也道拉統軍克敵有功布達
居邊悅以使人西北重鎮也浩善巡邊以廉稱古裕鎮
撫而民富圖丹駐金肅而夏人不敢東獵噫部人內附
方面以寧雖朝廷處置得宜而諸將之力抑亦何可少
哉

遼史卷九十二

遼史卷九十二考證

耶律古裕傳二十一年古裕改天成軍節度使 按聖宗本紀統和二十九年之次年改元開泰閱八年又改元太平閱十一年興宗即位改元景福止一年即改元重熙凡二十四年此所書二十一年應係指重熙二十一年然考興宗本紀二十一年內無耶律古裕改天成軍節度使之文未敢遽指為重熙間事姑仍其舊

遼史卷九十二考證

欽定四庫全書薈要卷六千二百十七

遼史卷九十三

元中書右丞相總裁托克托等修

列傳第二十三

蕭惠

慈實努

蕭頁嚕

都勒幹

蕭托雲

耶律都沁

蕭惠字伯仁小字托果斯淳欽皇后弟阿固齊五世孫
初以中宮親為國舅詳袞從伯父巴雅爾征高麗至努

克特北嶺高麗阻險以拒力戰破之及攻開京以軍律
整肅聞授契丹行宮都部署開泰二年改南京統軍使
尋為右伊勒希巴加同中書門下平章事朝議以遼東
重地非勲戚不能鎮撫乃命惠知東京留守事改西北
路招討使封魏國公太平六年討回鶻阿爾斯蘭徵兵
諸路獨準布酋長濟喇後期立斬以徇進至甘州攻圍
三日不克而還時濟喇之子聚兵來襲準布酋長烏巴
密以告惠未之信會西準布叛襲三克軍都監尼嚕古

圖吉部節度使嘉哩額布勒等將兵三千來救遇敵于
哈屯城西南嘉哩額布勒戰歿士卒潰散惠倉卒列陣
敵出不意攻我營衆請乘時奮擊惠以我軍疲敝未可
用弗聽烏巴請以夜斫營惠又不許準布歸惠乃設伏
兵擊之前鋒始交敵敗走惠為招討累年屢遭侵掠士
馬疲困七年左遷南京侍衛親軍馬步軍都指揮使尋
遷南京統軍使興宗即位知興中府歷順義軍節度使
東京留守西南面招討使加開府儀同三司檢校太師

兼侍中封鄭王賜推誠協謀竭節功臣重熙六年復為契丹行宮都部署加守太師徙王趙拜南院樞密使更王齊是時帝欲一天下謀取三關集羣臣議惠曰兩國彊弱聖慮所悉宋人西征有年師老民疲陛下親率六軍臨之其勝必矣蕭孝穆曰我先朝與宋和好無罪伐之其曲在我況勝敗未可逆料願陛下熟察帝從惠言迺遣使索宋十城會諸軍于燕惠與太弟帥師壓宋境宋人重失十城增歲幣請和惠以首事功進王韓十二

年兼北府宰相同知元帥府事又為北樞密使十三年
夏國李元昊誘山南党項諸部帝親征元昊懼請降惠
曰元昊忘奕世恩萌姦計車駕親臨不盡歸所掠天誘
其衷使彼來迎天與不圖後悔何及帝從之詰旦進軍
夏人列拒馬于河西蔽盾以立惠擊敗之元昊走惠麾
先鋒及右翼邀之夏人千餘潰圍出我師逆擊大風忽
起飛沙眯目軍亂夏人乘之蹂踐而死者不可勝計詔
班師十七年尚帝姊秦晉國長公主拜駙馬都尉明年

帝復征夏國惠自河南進戰艦糧船綿亘數百里既入敵境偵候不還鎧甲載于車軍士不得乘馬諸將咸請備不虞惠曰諒祚必自迎車駕何暇及我無故設備徒自弊耳數日我軍未營候者報夏師至惠方詰妄言罪諒祚軍從阪而下惠與麾下不及甲而走追者射惠幾不免軍士死傷尤衆師還以惠子慈實努殁于陣詔釋其罪十九年請老詔賜肩輿入朝策杖上殿辭章再上乃許之封魏國王詔冬夏赴行在參決疑議既歸遣賜

湯藥及他賜賚不絕每生日輒賜詩以示尊寵清寧二年薨年七十四遺命家人薄葬訃聞輟朝三日惠性寬厚自奉儉薄興宗使惠恣取珍物惠曰臣以戚屬據要地祿足養廉奴婢千餘不為闕乏陛下猶有所賜貧於臣者何以待之帝以為然故為將雖數敗衄不之罪也弟實喇武定軍節度使二子慈實努烏爾古納烏爾古納終北府宰相慈實努字寧隱太平初補祇候郎君上愛其勤慎陞扎薩克轄加右監門衛上將軍西邊有警

授西北路招討都監領保大軍節度使政濟思威諸部
悅附為殿前副點檢歷烏爾古德呼勒詳袞征李諒祚
為統軍都監與西北路招討使達魯噶率蕃部諸軍由
北路趨涼州獲諒祚親屬夏人扼險以拒慈實努中流
矢卒年五十一贈中書門下平章事

蕭頁嚕字和多沁五院部人父楊珠歷官節度使頁嚕
重熙間為牌印郎君清寧九年國家既平重元之亂其
黨郭九等亡詔頁嚕追捕獲之遷護衛太保咸雍元年

使宋議邊事稱旨知殿前副點檢事五年準布叛為行
軍都監擊敗之俘獲甚眾初軍出止給五月糧過期糧
乏士卒往往叛歸頁嚕坐失計免官降戍西北部未行
會北部兵起頁嚕將烏爾古德呼勒兵敗之每戰以身
先繇是釋前罪命總知烏爾古德呼勒部九年德呼勒
叛都監耶律都木達以兵少不戰屯臚朐河德呼勒合
邊人掠居民頁嚕力戰敗之獲其輜重繼聞酋長和卓
三千餘騎掠附近部落縱兵躡其後連戰二日斬數千

級盡得被掠人畜而還值德呼勒黨五百餘騎刼捕鷹
戶逆擊走之俘斬甚衆自是德呼勒勢沮時德呼勒方
為邊患準布相繼寇掠邊人疲弊朝廷以地遠不能時
並援軍而使疆圉帖然者皆頁嚕力也帝嘉其功拜左
皮室詳袞會宋求天池之地詔頁嚕兼統兩皮室軍屯
達里庫山以備之太康初準布叛遷西北招討都監從
都統耶律卓克算征討有功改南京統軍都監黃皮室
詳袞尋遷東北路統軍都監卒弟都勒幹

都勒幹字薩巴幼警悟異常兒三歲失母哭盡哀見者
傷之及長魁偉沉毅好學善屬文有才幹年三十始仕
為朝野推重給事北院知聖旨事太康二年伊遜再入
樞府都勒幹素與蕭巖壽善誣以罪謫戍西北部坐皇
太子事特恩減死仍錮終身在戍十餘年太子事稍直
始得歸鄉里屏居謝人事一日臨流聞雉鳴三復孔子
時哉語作古詩三章見志當時名士稱其高情雅韻不
減古人壽隆六年卒年六十一乾統初贈彰義軍節度

使

蕭托雲字烏延北府宰相哈里之子統和初皇太后稱制以戚屬入侍尋為烏爾古都監討舒穆魯等部有功遷烏爾古節度使十九年總領西北路軍事後以本路兵伐甘州降其酋長伊蘭既而伊蘭復叛命討之克肅州盡遷其民于托輝口故城師還詔尚金鄉公主拜駙馬都尉加同政事令門下平章事上言曰準布今已服化宜各分部治以節度使上從之自後節度使往往非

材部民怨而思叛開泰元年七月錫林太師阿勒達殺其節度使西奔鄂爾多城蓋古所謂龍庭單于城也已而準布復叛圍托雲于哈屯城勢甚張托雲使諸軍齊射却之屯于鄂爾多城明年北院樞密使耶律華格引兵來救托雲遣人誘諸部皆降帝以托雲始雖失計後得人心釋之仍領諸部請益軍詔讓之曰叛者既服兵安用益且前日之役死傷甚衆若從汝謀邊事何時而息遂止會公主坐殺家婢降封郡主托雲罷使相尋為

烏爾古德呼勒詳袞以老代還卒子雙寬南京統軍使
孫額都溫尚三韓郡王赫魯之女固頁公主終烏爾古
德呼勒部統軍使以善戰名于世

耶律都沁字達年積慶宮人仕統和間性疎簡不顧小
節人初以是短之後侵宋分總羸師以從及戰取緋帛
被介冑以目標顯馳突出入敵陣格殺甚衆太后望見
喜召謂之曰卿戮力如此何患不濟厚賞之由是多以
軍事屬任俄授東北詳袞開泰二年進討準布克之重

熙間歷東路統軍使天德軍節度使十七年城西邊命
都沁相地及造戰艦因成樓船百三十艘上置兵下立
馬規制堅壯稱旨及西征詔都沁率兵由別道進會于
河濱敵兵阻河而陣帝御戰艦絕河擊之大捷而歸親
賜卮酒仍問所欲都沁對曰臣幸被聖恩得効駑力萬
死不能報國又將何求帝愈重之手書都沁衣裾曰勤
國忠君舉世無雙卒于官年七十子迪里歷觀察節度
使

論曰初遼之謀復三闕也蕭惠贊伐宋之舉而宋人增幣請和狃於一勝移師西夏而勇智俱廢敗潰隨之豈非貪小利迷遠圖而然况所得不償所亡利果安在哉同時諸將撫綏邊圉若頁魯忠勤不伐都勒幹高情雅韻都沁雖廉不逮蕭惠而無邀功啓釁之罪亦庶乎君子之風矣

遼史卷九十三

遼史卷九十三考證

蕭惠傳十七年尚帝姊秦晉國長公主拜駙馬都尉

按帝字原本誤作弟今據宏簡錄改

蕭托雲傳十九年總領西北路軍事後以本路兵伐甘

州降其酋長伊蘭 按聖宗本紀統和二十六年蕭

托雲奏討甘州回鶻降其王耶刺里撫慰而還此處

原本稱降其酋長牙懶即此事也牙懶與耶刺里俱

係音近之譌今畫一改

總論內都勒幹高情雅韻都沁雖廉不逮蕭惠而無邀
功啓釁之罪亦庶乎君子之風矣 按都勒幹高情
雅韻等句原本作鐸幹高情雅韻鐸盧幹雖廉不逮
惠而無邀功啓釁之罪考高情雅韻係都勒幹傳中
語都沁傳無此四字蓋都勒幹原本作鐸盧幹都沁
原本作鐸幹兩名俱有鐸字遂至互易其名而誤也
今據傳改正

遼史卷九十三考證